

05 DEC 1999

Mahathir-Kaji

BN KAJI PRESTASI PILIHAN RAYA UNTUK SUSUN LANGKAH

JITRA, 5 Dis (Bernama) -- Datuk Seri Dr Mahathir Mohamad berkata Barisan Nasional sedang membuat penilaian prestasi parti itu pada pilihan raya yang lepas dengan harapan untuk merampas kembali semua kerusi yang ia tewas.

"Kita akan kaji sebab-sebab menang dan sebab-sebab yang membawa kekalahan kepada calon BN," kata Perdana Menteri.

Dr Mahathir berharap dengan adanya penilaian itu, BN dapat menyusun langkah bagi menghadapi pilihan raya yang berikutnya.

"Kita berharap dapat tebus kembali tempat-tempat yang kita kalah, dan di tempat yang menang, harap dapat tambah majoriti pada pilihan raya ke-11 nanti," katanya semasa berucap pada majlis jamuan kesyukuran bersama pekerja jentera BN Parlimen Kubang Pasu di sini hari ini. Dalam pilihan raya Isnin lepas, Dr Mahathir menewaskan calon PAS, Subky Latif bagi mempertahankan kerusi Kubang Pasu.

Turut bersama pada majlis itu ialah Menteri Kesihatan Datuk Chua Jui Meng, Anggota Exco Kerajaan Negeri Datuk Syed Razak Syed Zain dan wakil peribadi Perdana Menteri di Kubang Pasu Tan Sri Osman Aroff. Yang turut hadir ialah Barishah Saad, calon BN yang memenangi kerusi negeri Tunjang dan Prof Datuk Othman Ishak yang berjaya di kawasan negeri Jitra.

Dr Mahathir berkata beliau amat berterima kasih kepada semua petugas pilihan raya kawasan itu sehingga membolehkan beliau memenangi kerusi itu.

Beliau juga berjanji akan menjalankan tugas sebaik mungkin sebagai wakil rakyat.

Dr Mahathir juga mahu supaya semua calon BN yang menang bekerja keras demi kesejahteraan rakyat.

Kepada yang kalah, beliau berharap mereka terus memberi khidmat kepada masyarakat sebagai anggota BN.

-- BERNAMA

MZM MAN MAI